

12 Tōku maunga

Te kake i tōku maunga

Mahere wātū

Ngā karere matua

- Mā te whiwhi mātauranga me ngā tohu au e āwhina kia nui aku arawātea aramahi.
- He nui ngā whare ako kē e whiwhi tohu ai au e arotau ana ki tōku āhua noho me ōku wawata aramahi.

Te raupapa wātū

1. Arotakea ngā mea kua kapi i ngā rangatahi mō te ōhanga me ngā pakihi Māori tae noa mai ki nāianei.

Tonoa ngā rangatahi kia kōrerorerotia takiruatia tēnei pātai:

- He aha te wāhi o ngā pakihi Māori me te ōhanga ki aku kōwhiringa aramahi?

Ka pau tōna rua meneti, matapakina ā rātou urupare, me ngā kōrero kei runga i te kiriata Ko koe me te ōhanga o Aotearoa.

- He aha te tikanga o ia kōrero?
- He pono?
- E hia tō pakeke hei te tau 2040?
- He aha tō tūnga i tō tātou ōhanga?

2. Whakamaharatia ngā rangatahi ki te whakatakinga i oti i a rātou i te tīmatanga o te Wātū 8. Tērā tonu pea nā rātou tō rātou maunga i tautuhi. Ahakoa kua kitea e rātou, kāore rānei, he wāhi tūturu anō tō rātou maunga tērā ka whakakanohi i a rātou me ō rātou tūpuna.

Kī atu ki ngā rangatahi mō te whakangungu me ngā tohu tēnei wātū. Kei te kake rātou i tō rātou anō maunga me te whiwhi pūkenga, tohu anō hoki, ka āwhina i a rātou ki te hanga i tō rātou anō huarahi i roto i te ōhanga.

3. Mō ngā mōhiohia me ngā mahi tiro anō mō NCEA tirohia te Wātū 5, te kēmu Te whai māramatanga NCEA, i te wāhanga Ngā mahi a ngā tūpuna.
4. Kī atu ki ngā rangatahi ko te NCEA Taumata 1 te taumata tuatahi o te poutama tohu tērā ka piki atu ki te Taumata 10. Tohaina te tātauirā mō te New Zealand Qualifications and Credentials Framework me ngā kāri NZQCF. Tonoa rātou kia waihanga anō i te anga mātauranga mā te whakanoho i ngā kāri NZQCF ki te wāhi tika i te tātauirā.

I te wāhanga tuarua o te ngohe, ka hanga ngā rangatahi i tētahi koeko anō mā te whakatakoto i ngā kāri Tohu ki te wāhi tika i tētahi tātauirā pātea.

Matapakina ngā whakautu mō ngā ngohe e rua pērā e whakaaturia ana i ngā kiriata New Zealand Qualifications and Credentials Framework e rua.

Ngā āheinga aramahi matua

Whakaatu māramatanga ki te hononga i waenga i te angitu mātauranga me te whakamahere aramahi.

Whakaatu māramatanga ki ngā huarahi ako me ngā pūkenga ina kōwhiri marau, akoranga me ngā arawātea whakangungu.



Ngā pātai matua

He aha ngā tohu ka āwhina i a koe i tō huarahi aramahi hei anamata?



Ngā rauemi tautoko

Kaiārahi PowerPoint 12

Ngohe rangatahi: Tātauirā NZQCF

Ngohe rangatahi: Ngā kāri NZQCF

Ngohe rangatahi: Ngā kāri tohu

Ngohe rangatahi: Te whakatōmene ara

Ngohe rangatahi: Mahere mahi aramahi whenua (Wātū 8)

Whakatōmenetia te ako me te whakangungu

Te ako me te whakangungu



Roanga

40-50 meneti

12 Tōku maunga

Te kake i tōku maunga

Mahere wātū (e haere tonu ana)

5. Pātaihia ngā rangatahi me haere rātou ki hea tiki mōhiotanga anō ai hei āwhina i tā rātou whai i tō rātou huarahi aramahi. He aha ngā whare ako, whakahaere whakangungu rānei kei tō rātou anō takiwā? He aha ngā akoranga, marau hoki ka taea te whai ki reira?

Whakaaturia ki a rātou te wāhanga Whakatōmenetia te ako me te whakangungu i Tahatū hei āwhina i tā rātou whakautu i aua pātai. Tohaina te ngohe Te whakatōmene ara, ka tono i ngā rangatahi ki te whakataurite i ngā whare ako, whakahaere whakangungu rānei ki te whakamāramatanga tika, ka whakautu i ngā pātai.

Matapaki tahitia ēnei me te rōpū:

- Ko wai tētahi e mōhio ana rātou kei te whai akoranga ki tētahi o aua whakahaere?
- Kei te ako i te aha?

Whakaaturia te wāhanga Te ako me te whakangungu i Tahatū.

6. Tonoa ngā rangatahi kia whakaoti i te wāhanga Te maunga o tā rātou mahere mahi aramahi whenua. Whakaūngia anō, ko tēnei tō rātou maunga, ā, mā ā rātou kōwhiri e āwhina tā rātou whai i tō rātou anō huarahi.
7. Pānuitia anō te whakataukī o te mahere mahi aramahi whenua, ka kōrerorero ai i te hiranga o te noho takatū ki ngā arawātea ka tūpono noa i mua. Hei tauira, te whakamātautau wheako hou, te hanga i āu ake kōwhiringa, te hono ki ngā tāngata papai, me te hanga i ngā pūkenga me te whiwhi tohu ka hāpai i tō huarahi aramahi. Hoki atu anō ki ngā tuhipoka mahere mahi aramahi whenua o te rauemi kaiārahi hei āwhina i tō whakapakari i te mahere mahi.